

CHRIST, EYEN-ERỌŃ ABASI

Isaiah 53:1-12; Utom Mme Apostle 8:26-35

ỌYỌHỌ UKPEP-ŃKPỌ 367

Eke Ikpọ Owo

IKỌ IBUOT: “Owo ese enye ke ndek, onyũ esin enye; enye edi owo ukut, onyũ emehe ke mfuho; onyũ etie nte owo eke odipde nnyin iso; esin enye ke ndek, nnyin inyũ ibatke enye ke owo” (Isaiah 53:3).

I Mme Ntiñ-nnim Ikọ Ke Abańa Christ

- 1 Jesus ekedi etiene mme Jew, edi unana edinim ke akpanikọ mmọ okim mmọ enyin, inyũ iyakke mmọ eda Enye nte Andinyańa mmọ, Isaiah 53:1; John 12:38; ńwed Mbon Rome 10:16
- 2 Suń-suń ye usuhọre idaha Jesus ama anam ediwak owo etre nditiene Enye, Isaiah 53:2; 52:14
- 3 Esin Enye ke ndek, inyũ ibatke Enye ke owo, Isaiah 53:3; 50:6; Matthew 26:67; 27:30, 31
- 4 Enye ọkọbọ ufen ke ntak idiok-ńkpọ emi midighe Esie; ndien mme ukwań-ńkpọ nnyin odoro Enye ke idem, Isaiah 53:4-6; Matthew 8:17; 1 ńwed Corinth 15:3; Mme Hebrew 5:8; 1 Peter 2:24
- 5 Ke nsuhọre-idem ye ọyọhọ nsuk-ibuot, Enye akakpa mkpa afai emi midotke, Isaiah 53:7, 8; Matthew 26:62, 63; 27:11, 12; Utom Mme Apostle 8:32, 33
- 6 Enye akakpa ye mme idiok owo, onyũ onim udi Esie ye owo inyene, Isaiah 53:9; Matthew 27:57-60
- 7 Ke ntak usio-isop Esie, mkpa, eriset ke mkpa, ye akam mkpe-ubok Esie, Enye eyebọ erifen ọnọ ediwak ukpọń, ndien ke akpatre Enye eyekan kpukpru mme asua Esie, Isaiah 53:10-12; Luke 22:37; Utom Mme Apostle 13:38; ńwed Mbon Rome 3:25; 5:15,18
- 8 Philip akada ufań ńwed emi, Isaiah 53:7, 8; onyũ ọkwọrọ abańa Jesus ọnọ owo eunuch, Utom Mme Apostle 8:26-35; Luke 24:27; Utom Mme Apostle 18:28.

SE EKPEPDE EBAŃA

ńwed Isaiah ibuot aba ye duopeta emi, edi kiet ke otu ibuot ńwed emi mme owo emade ekan ke ńwed Abasi. Kpukpru owo ekpenyene ndimum enye nsin ke ibuot. Mbet ema etim efiok ete ke ibuot ńwed emi etiń abańa Jesus. Eunuch, owo Ethiopia, okokot itie ńwed emi ke ini Philip okosobode enye. Philip obup enye ete “Nte ọmọfiok se ikọ oro okotde ọwọrọde?” Eunuch ọbọrọ enye ete, “ńkeme didie ke owo mitemeke mi?” “Ndien Philip atat inua esie, ọtọńọ ke ikọ ńwed Abasi emi, ọkwọrọ Jesus ọnọ enye.”

Unana Edinim Ke Akpanikọ Mme Owo

Anditiń ntiń-nnim ikọ oro otim ese Andinyańa emi ọkọbọde ufen nte ńkpọ eke enye okodude ke itie krọs onyũ okutde kpukpru se ikadade itie.

Ke adańemi enye ekeseke ini iso onyũ okutde erisin emi mme Jew ekeseke Andifak oto ke unana edinim ke akpanikọ mmọ, enye ofiori ete, “Anie onim mbuk nnyin ke akpanikọ?” Ama odu ntak iba emi ekpekesinde mmọ enim ke akpanikọ. Ntak kiet ekedi ke mme anditiń ntiń-nnim ikọ ọtọńọde ke Moses tutu aka iso, ema etiń abańa eridi Edinen Owo Kiet. Mfina mmọ ekedi ke mmọ ekenyene idorenyin ndikut ọkposọń owo ye ọyọhọ ubọń nte edidem. Mmọ ikonimke ite ke enye emi ekedide suń-suń ye ifure-ifure owo Nazareth ekeme ndidi Andifak mmọ.

Ọyọhọ ntak iba emi ekpekesinde mmọ enim ke akpanikọ ekedi mme idiọñọ ye utibe-ńkpọ emi eketienede ukwọrọ-ikọ Esie. “Ubọk Jehovah” ama onyūñ “ayarare” ke ndikọk mme udọñọ emi owo mikekemeke ndikọk. Ema enam mme akpa-mkpa eset, mbon akpamfia ema esana, ema etat mme nnan enyin, inan ema ekop ńkpọ. Ikoduhe udọñọ emi mikokureke ke idak akamba odudu Esie.

Usen kiet Jesus ama ọdọhọ otu owo ete: “Enim Mi ke akpanikọ ete, Ami ndu ke Ete, Ete onyūñ odu Mi ke Idem; midighe, enim se ntiñde ke akpanikọ ke ntak utom Mi” (John 14:11). Baba owo ndomo kiet inamke mme utibe-ńkpọ emi Enye akanamde. Edi kpa ye oro, esit mmọ ọkọyọhọ ye unana erinim ke akpanikọ.

Ke adañemi nnyin ikerede ke ediwak ini nte ubọk Jehovah ayararede ọñọ nnyin ke eyo Ukperedem Edim Eti-mbuk emi, nte ekọkde kpukpru oruk udọñọ ye nte enamde mme nsio-nsio utibe-ńkpọ, nnyin, ńko, ida ise ye mkpa-idem, unana edinim ke akpanikọ mme owo. Etie nte ufuhọ-ńkpọ emi akanamde enyin okim mme Jew onyūñ anam enyin Mme-idut (mme Gentile) okim ńko.

Mfuhọ Ye Ukut

Enye ama obiom ukut ye mfuhọ tutu iso Esie anana uyai akan iso owo efen. Enye ikenyeneke uyai ke idem Esie emi akpanamde mme owo esik ekpere Enye. Iduhe baba owo kiet emi ebemde Enye iso me etienede ke edem emi ekekemedede ndibiom ukut ofuri ererimbot nte emi Enye okobiomde. Ke Inwañ oro Enye okofiori, “Ukpọñ Mi ọfuhọ eti-eti ekpere ndikpa.” Enye okobiom ndodobi mbiomo ke adañemi Enye akasañade ke usuñ ndika Calvary. Enye ama akpa ke mbuñ-osit. Mme Jew ekekere ete ke Enye edi owo abiaña, ndien ke ntak oro ke Abasi ọkọtọ Enye. Unana edinim ke akpanikọ ama okim mmọ enyin.

Usio-isop

Usio-isop oro ke Calvary ekedi ọyọhọ usio-isop ọñọ ukpọñ ye ikpọhidem. Enye okobiom mfuhọ ye ukut nnyin. Ekeme ndidi mfuhọ emi ada ọñọ mfuhọ esit ye eke ekikere, oro edi, mme idiọk-ńkpọ nnyin. Enye okobiom mmọ ke idem Esie ke eto. Ema enam Enye emi mikọdiọñọke idiọk-ńkpọ edi idiọk-ńkpọ ọñọ nnyin man oto do emen mme ukwañ-ńkpọ nnyin efep.

Mme ubiak ikpọhidem nnyin edi kiet ke otu mme ukut. Enye akada mbiet owo esine man Enye ekpetiene nnyin okut mmem-idem nnyin. Ndien inia Esie ọkọk nnyin.

Udọñọ, ke usuñ kiet ekededi, oto ke ntak idiọk-ńkpọ. Edieke idiọk-ńkpọ mikpokoduhe ke eritọñọ, udọñọ ikpoduhe. Usio-isop ofuk mmọ mbiba. Ke ini uwa oro ekedide ọyọhọ onyūñ ekemde udeme ndinyaña owo ekededi emi amanade me edinyuñ amanade oduk ke ererimbot, usio-isop idiọk-ńkpọ enyene adaña onyūñ ana ọñọ owo emi akabarede esit oto ke editua mkpọfiọk ke idiọk ido. Abasi ọñọ mbọm, edi ana owo ọbọ mbọm oro man enye ekpekeme ndibọ erifen.

Erida Itie

“Ufen odorọ Enye ke idem man nnyin ikut emem.” Mme ete ye eka esitunọ nditọ mmọ ke ini mmọ enamde ndudue, man enuk mmọ esin ke eti usuñ. Ekemia Enye ufen ke ntak ndudue nnyin. Enye emi mikọfiọkke idiọk-ńkpọ, akananam inamke ńkpọ eke akwañade, edi Abasi ọtọ Enye ke ntak mme idiọk-ńkpọ nnyin, man oto do nnyin inyene emem ye Abasi. Enye akada itie nnyin, ayak uwem Esie ọñọ ke itie uwem nnyin, man oto do uwem nnyin oñwum mfri edinen ido emem.

Ukwañ Ikpe

“Ke akwa usuhọre esie ebiat ikpe Esie efep.” Ekebat Enye nte owo abiaña, do ndien ikekpehe ikpe Esie ke unen. “Wot Enye ke cross, wot Enye ke cross” ekedi mfiori otu owo emi ekedamade nte idat. Owo ikeyakke baba owo ndomo kiet etiñ ńkpọ abaña Enye. Ke suñ-suñ ido ye ke nsuhọridem, Enye okobiom enye. Ndien kpa nte uman erọñ odopde inua ke iso mme andifat enye, kpa ntre Enye inyuñ itatke inua Esiemọ. Nwọrọ-nda ńkpọ kiet ke uwem Jesus ekedi ndop-uyo Esie. “Ndien ke ini ikpọ oku ye mbiowo edoride Enye ikọ, Enye ibọrọke baba ikọ kiet. Pilate ọdọhọ Enye ete, nte ukopke adaña ediwak ńkpọ eke mmọ etiñde edian Fi? Ndien Enye ibọrọke baba ikọ kiet; esin idem akpa andikara eti-eti” (Matthew 27:12-14).

Udi Esie Ye Mbon Inyene

Edikōn Enye ye mbon ino iba ekedi ndinam man Enye enyene udi Esie ye mme idiok owo. Nditre ndinō Enye eribuk emi asaṅade ye ukpono ekedi ata n̄kpọ esuene. Owo inyene kiet, Joseph owo Arimathaea, ama ebine Pilate onyuñ ebeñe enye okpo Jesus. Owo inyene efen, Nicodemus, andikara Itie-ukpono Abasi mme Jew, ada edinem utebe aran, ndien mmọ esaña ọtọ kiet ekenim okpo Jesus ke obufa udi emi akananam mibukke owo. Ke ntre ntiñ-nnim ikọ Isaiah ama osu.

Usuñ Uwem

“Kpukpru nnyin idiyo nte erōñ.” Nnyin ima iyo ikpōn ufok erōñ, uduot idiok-n̄kpọ nnyin ekebin nnyin aka ke nsobo, ndien nnyin isop, isop ke nsinsi! Edi Jehovah ada ukwañ-ido kpukpru nnyin odori Enye. Jesus edi usuñ eritōñ ntak nnyene uwem, ana-iñwañ usuñ emi nnyin ikemedede ndibe nduk nnyuñ mbọ erinyaña. Ubiak krọs oro, ọkpọsōn ukut oro, edi Enye obiom mmọ kpukpru inyuñ isioroke uyo man nnyin ikpokut usuñ ndifiak ntiene Abasi. Nnyin itōñke aba ntak ida ke mben nsinsi nsobo inyuñ ise n̄kim-n̄kim esit esie ndien idohọ, “idorenyin iduhe.” Jesus ama odori ebọp ebe ke akwa ebedeñ emi. Enye emen nnyin odori ke afara Esie man ọtōñ ntak ada nnyin ọsok Abasi (Luke 15:5).

**“O, Ima ‘dade ‘rinyaña ‘di
O, mfọn ‘dade ‘nye sọk owo
Se a-kwa ‘tom Ọbọñ a-namde
Ke Calvary**

**Mbọm ye mfọn emi okponde
Do ke ekefen m’idiok-n̄kpọ mi
Do ukpōn mi ekenyene ‘mem
Ke Calvary.”**

Ekemia Enye emi mikenamke idiok-n̄kpọ ufen, man oto do enye emi akanamde idiok-n̄kpọ akabare ọbọ utip nte enye emi enende.

Mkpasip Esie

“Enye eyekut ubọn Esiemọ, mme usen esie eyebighi, ndien se Jehovah amade eyesiaha Enye ke ubok.” Okposuk edi nte ekesibede enye efep ke isōn mme odu-uwem, ubon Esie kpa mme anditiene-Christ ewak eti-eti. Ediwak eyet ọfōn-idem mmọ ke Iyip Eyen-erōñ ndien emana eduk ke Obio Ubọn Abasi. John ama okut akwa otu owo, emi baba owo kiet mikemeke ndibat, eke otode ke kpukpru obio ye esien ye idut ye usem, ada ke iso ebekpo ye ke iso Eyen-erōñ, esine mfia ọfōñidem, enyuñ ekama ndak eyop ke ubok. Nte ebat fi esin ke otu mme Jew emi minimke ke akpanikọ? Me nte ewet enyiñ fo esin ke Nwede Uwem Eyen-erōñ?

Ke Enyin Ntiñ-Nnim Ikọ

Isaiah, oto ke enyin ntiñ-nnim ikọ ama okut ini iso onyuñ eneñere owut uwem Christ (okposuk edi nte edide ibio-ibio, ukem-ukem) nte Matthew, Mark, Luke ye John emi ekesaṅade ye Enye ke ini uwem Esie ke isōn. Enye ama ada enyin ntiñ-nnim ikọ okut Jesus ọtōñde ke ini uyen Esie tutu osim ini emi Enye enyenede mbọm abaña otu owo onyuñ ọkọkde udōñọ mmọ; ndien ebe ekese mme usen esuene ye ubierikpe Esie ke ini Enye akpade ye mme idiok owo, enyuñ enim udi Esie ye mbon inyene.

Anditiñ ntiñ-nnim ikọ emi ama okut Enye ke ama ekese ke mkpa. Enye ama okut Ufok Abasi emi ekepede ke Iyip, ye akpatre erikan Jesus ke ini Enye edibaharede mbume ye mkpọsōn owo.

Nso utọ uwem! Nso utọ Andinyaña! Nso utibe Eti-mbuk, emi Abasi ekekerede ke esit Esie ndifiak nda ubon Adam emi ama ọkọduọ n̄tōñ ntak ndian ke ima Abasi!

MME MBUME

- 1 Anie owo ke anditiñ ntiñ-nnim ikọ emi etiñ ikọ abaña ke Isaiah ibuoṭ aba ye duopeta emi?
- 2 Edieke idiok-ñkpọ adade mfuhọ ọsok esit nnyin, nso ñkpọ ke enye anam ke ikpohidem nnyin?
- 3 Eda Enye nte Eyen-erọñ eka ekewot ọwọrọ didie?
- 4 Ntiense ifañ eketiñ ikọ edian Jesus ke ini ikpe Esie?
- 5 Nso ñkpọ ke usio-isop ofuk?
- 6 Anie okobuk Jesus?
- 7 Mme anie edi ubon Jesus?
- 8 Edibahare mbume ye mkposọñ owo ọwọrọ didie?
- 9 Ke nso utọ usuñ ke mkpa Jesus akakabare ada itie nnyin?